

Versioun 2 : 18.04.2020

Versioun 1 : 14.03.2020

Rotschléi fir eng BA am Kontext vum COVID-19 :

- Proposéiert ären Avex, CaraPio, RaRo a **Chefs**, fir während hirer Fräizäit "ufällege" Leit, déi wéinst dem Coronavirus sollen doheem bleiwen, Kommissiounen ze erleedegen (z.B. Liewensmëttel an Hygiènesartikelen akafe goen, Medikamenter besueren, asw.).
- Als Guiden a Scouten limitéiere mir eis Hëllef op "ufälleg" Leit (héijen Alter, chronesch krank), déi keng Famill oder Frënn hu fir hinnen ze hëllefen. Mir ginn net bei Leit, déi wéinst dem Covid-19 "isoléiert" sinn (d.h. mam Virus infizéiert a krank sinn) oder a Quarantaine sinn (d.h. a Kontakt mat engem Covid-Infizéierte waren). Mir däerfen op kee Fall d'Weeër vun den Infizéierten an de Risikoleit kräizen.
- De Coronavirus iwwerdréit sech iwwer Drëpsen, also beim Houschten oder Néitsen. Vu jonke Leit, déi keng Symptomer hunn, ass den Infektiounsrisiko bei deene kuerze Kontakter un der Dier, fir d'Kommissiounen ze iwwerreechen, ganz geréng. Op jiddwer Fall méi niddreg wéi wann "ufälleg" Leit sech musse selwer a Supermarchéen deplacéieren.
- Heifir musse keng Versammlungen organiséiert ginn, benotzt léiwer elektronesch Kommunikatiounsmëttel wéi SMS, FB-Messenger, Whatsapp, asw.
- Beschränkt iech op dat lokaalt Ëmfeld (Uertschaft, Quartier).
- Informéiert déi betrafte Leit dass dir dës Hëllef kënnt ubidden. Denkt drun, dass dëst virun alem eeler Leit sinn, déi wéineg an de soziale Medie present sinn. Dir kënnt z.B. e Bréif / Flyer an de Bréifkëschte verdeelen oder a "strategesche" Plazen aushänken (an de Supermarchéen, Apdikten, bei Dokteren, asw. heifir kann d'Géisserei iech Kopie maachen (kontaktéiert dofir d'Verbandssekretariat iwwer Mail oder Telefon), verschidden Dréckereien waren och bereet, dat ze sponseren.
- Informéiert och är Gemeng, dass dir dës BA ubitt, si kënnen iech bei der Organisatioun hëllefen, z.B. d'Bierger informéieren, Léisunge fir d'Bezuele fannen, Ressourcen deelen (verschidde Gemenge bidde parallel schonn en änleche Service un).
- Definéiert eng Telefonsnummer an/oder Mailadress, iwwert déi d'Leit iech kënne kontaktéieren. Dir kënnt och präzis Zäite fest leeën, op deenen dir Commanden unhuelet.

Lëtzebuerger Guiden a Scouten

Verbandscomité

5, rue Munchen-Tesch | L-2173 Lëtzebuerg

+352 26 94 84 | info@lgs.lu | lgs.lu

1



E grouse Merci un eis Sponsoren

lalux[®]

VOYAGES
VANDIVINIT
Ressort mat Stil

BIL
BANQUE
INTERNATIONALE
À LUXEMBOURG
1856

- Frot iech bei de betraffene Leit eng genee Akafslëscht, am beschte schrëftlech.
- Iwwerleet iech, ob d'Leit iech d'Sue virstrecken oder réischt duerno bezuelen. Verschidde Geschäfte wëllen am Moment am léifste mat Kaart bezuelt ginn oder huele guer kee Boergeld méi un. Sidd virsiichteg, wann eeler Leit eis dowéinst wëllen hir Kreditkaart inklusiv PIN-Code ginn, probéiert aner Léisungen ze fannen : mat der eegener Kaart bezuelen, iwwer Digicash, eventuell op Rechnung akafen...
- Selbstverständlech gëtt dës BA gratis ugebueden.
- **Respektéiert zu all Zäitpunkt d'Uweisung vum der Regierung, wat déi verschidde Schutzmoossnamen ugeet : souwäit wéi méiglech eleng akafe goen, Distanz zu anere Leit halen, wann eng Distanz vun 2 Meter net méiglech ass, e Mondschtz undoen.**
- Beim Akafen Händschen unzedoe mécht an dëser Situatioun wéineg Sënn, well d'Händsche si séier grad sou knaschteg wéi d'Fanger. Et geet duer, wann een d'Hänn virun an nom Akafe mat Waasser a Seef wäscht. Méi wichteg ass et, sech net mat de Fanger am Gesiicht unzepaken.
- Dot ëmmer d'LGS-Uniform an de Foulard siichtbar un soubal dir ënnerwee sidd fir am Kader vun der BA Kommissioun fir aner Leit ze maachen, dat schaaft Vertraue bei de Leit a weist, dass dir "an enger Missioun" ënnerwee sidd an net onnéideg (#bleiftdoheem).
- Probéiert lokal anzekafen an domadder d'Transporter mam Auto a mam ëffentlechen Transport ze vermeiden. Schéckt déi Jonk souwäit et geet zu Fouss oder mam Vëlo akafen. Falls en Auto wierklech noutwenneg ass (z.B. fir schwéier Akeef ze transportéieren), kënnt dir iwwert de *Garage Losch* ee geléint kréien.
- Kuckt, dass déi "ufälleg" Leit alles kréie wat se brauchen, encouragéiert awer keng „Hamsterkeef“.
- Respektéiert d'Killkette bei de Liewensmëttel.
- Mannerjäreger däerfe keen Alkohol a keng Tubaksprodukter akafe goen.
- Wann dir sollt Medikamenter an d'Apdikt siche goen, mussen d'Leit iech déi eng entsprecheend Ordonnance ginn. Et ass awer méiglech dass den Dokter dës Ordonnance schonn an d'Apdikt gefaxt oder gemailt huet.
- Wann dir gefrot gitt, fir mat Hënn Gassi ze goen, kënnt dir dat maachen, bedenkt awer dass dir da musst 2 bis 3 Mol den Dag den Hond musst ausféieren an dat all Dag. Ausserdeem kënne Leit, déi normalerweis mat hirem Mupp virun d'Dier ginn, dat och lo weiderhi selwer maachen, och wa si "ufälleg" sinn,

virausgesat si halen Distanz zu aneren.

- Mir bidde keen Taxi-Service un. Dir kënnt keng Leit transportéieren, och net op e Rendezvous bei den Dokter.
- Vergiesst d'Rechnungen net.
- Zéckt net, beim akafen an de Butteker, Apdikten, asw. ze erklären, dass dir Kommissiounen fir "ufälleg" Leit maacht, dat kann d'Akafen méi einfach maachen : a verschidde Geschäfte däreft Guiden- a Scouten z.B. eran ouni mussen an der Schlaang ze waarden oder kënnen op Rechnung akafen.
- Iwwerrecht de Leit d'Akeef un der Dier. E kuerzen Austausch heibäi ass wëllkomm a reduzéiert déi sozial Isolatioun vun den "ufällege" Leit. Bedenkt, dass dëst vläicht deen eenzege Moment am Dag (oder esouguer an der Woch) ass, wou Leit – déi eleng wunnen – momentan Kontakt mat anere Mënschen hunn. E kuerzt Gespräch oder och nëmmen e Laache vermëttelen an dëser schwéierer Zäit e bëssi Normalitéit. Vermeit awer dass dëst zu engem längere Kaffiskränzchen gëtt, wéinst der theoretescher Infektiounsgefahr. Schwéier Saachen kënnen dir awer natierlech eran droen, z.B. an de Keller. Nach eng Kéier : dës Leit sinn net krank !
- Wann d'Leit iech en Drénkgeld wëlle ginn, kënnt dir dat unhuelen an un e gudden Zweck spenden (eng Méiglechkeet ass de "Covid-19 Solidarity Response Fund for WHO" vun der Weltgesundheitsorganisatioun (<https://covid19responsefund.org>) oder fir d'Keess vun ärem Grupp halen (de Leit dat och soen).
- Wann der wëllt, kënnt der deenen ufällege Leit nach eng kleng "Iwwerraschung" dobäi ginn, z.B. eng Blumm oder eng Zeitung, dat ass gutt fir d'Moral. Déi méi jonk Branches (Biber, Wëllefcher, Avex) kënnen och doheem Saachen molen oder bastelen, déi da vun deene méi ale Branches un déi „ufälleg“ Leit verdeelt ginn, esou kënnen och si sech aktiv un der BA bedeelegen.
- Dir kënnt och Fotoen vun ärer BA maachen an op de soziale Medien posten, mat positiver Message kann een do de sëllegen Hiobsbotschaften entgéint wierken. Passt och hei op, dass d'Reegele vum "social distancing" vermëttelt ginn.
- Sidd iech bewusst, dass verschidde Moosnamen vun der Pandemie nach laang kënnen unhalen, méiglecherweis mussen vill "ufälleg" Leit nach wochen- oder esouguer méintlaang confinéiert bleiwen. Mat enger Kéier akafen goen ass et net gedoen. Erkläert deene Jonken dat och.
- Geréiert d'Leit déi hëllefen "nohaltig" : Denkt drun, dass zu engem gewëssen Zäitpunkt eenzel Guiden a Scouten eventuell net méi kënnen bei der BA matmaachen, z.B. well si (oder een aus hirer Famill) krank

sinn a se dowéinst ënner Quarantaine stinn, awer och well se nees an d'Schoul oder op d'Schaff mussen. Déi "ufälleg" Leit bleiwen awer weiderhin op iech ugewise. Halt iech dofir Leit am Hannergrond op Reserve, déi an deem Fall kënnen asprangen.

- Maacht heiansdo an ärem Grupp en Tëschebilan, z.B. iwwer Videokonferenz, an iwwerleet wat gutt leeft a wat ka verbessert ginn. Frot hei och déi Jonk no hirer Meenung.
- Wa Leit, déi keng Guiden a Scouten sinn, sech melle fir ze hëllefen, musst dir oppassen, dass si wierklech an eisem Sënn handeln. D'BA soll virun allem vun de lokale Guiden a Scouten ausgefouert ginn. Aner Leit kënnen vläicht besser bei enger anerer Initiativ hëllefen.
- Dës Aktioun leeft am beschten um lokale Plang. Dir musst net eng enorm Unzuel Leit beliwweren, well anerer bidden och hir Hëllef un, op verschidde Plaze sinn z.B. och d'Gemeengeverwaltungen an deem Sënn aktiv. Wann äre Grupp och nëmmen 2-3 Leit kann an dëser schwéierer Zäit hëllefen, dann hutt dir scho ganz vill gelescht.
- **Guiden a Scouten déi krank sinn (Féiwer, Houscht), däerfen net matmaachen a bleiwen doheem !**
- Dëst sinn allgemeng Rotschléi, fir iech ze hëllefen eng BA am Kontext vum Coronavirus op d'Been ze stellen, dir kënnt se gär un är lokal Besoinen upassen.
- **Weider Froen oder Bemierkunge kënnt dir u ba@lgs.lu mailen.**
- Virun allem : sidd kreativ, onkomplizéiert a gitt aktiv !

am Numm vum Verbandscomité
Dr David Heck